

〔續日本紀三十九〕延曆七年十一月庚戌播磨國揖保郡人外從五位下佐伯直諸成延曆元年籍冒注連姓至是事露改正焉。

〔三代實錄五〕貞觀三年六月廿一日甲子宣詔伊勢國司并大神宮司云豐受宮禰宜正八位上神主河繼同宮大內人外從八位下神主真雄同宮副大內人外少初位下神主伊勢雄等一祖之後分爭歷年或告冒名或云假姓尋其端緒互有是非並須摘其疵瑕正其罪法然而事行曩代答在先民既似疎違誠非姦伏加以發覺以來多經恩蕩神主同職子孫相仍稽之律條既非還正之類求之圖系猶見同姓之因所諍之釁同自先祖而發實非末孫之過周道如砥既往不咎況秋荼已厭國憲有常所犯事條非可追究宜令共保所帶之姓依舊得供神事但聞河繼等各依私事互闕神事須准法式重其科責此段別從在宥之義以崇一切之恩。

〔類聚三代格十二〕太政官符

應禁制外國百姓姦入京戶事

右齊衡二年三月十三日格僞延曆十九年十一月廿六日下民部省騰勅符僞都鄙之民賦役不同附除之事損益已異今聞外民挾姦競貫京畿非唯增口貪田實亦冒名假蔭如不改轍何絕詐僞自今以後一切禁斷者如聞外土之民姦附京畿多遁課役無懷土之心右大臣宣奉勅宜依延曆符嚴加禁止但有隱首色不獲已可附者氏中長者覆審加署申所司所司申官待報符而後附帳者年來外國百姓或賄小吏而貫京畿或賂戶頭而冒氏姓卽是格制雖存於前有司尚緩於後之所致也左大臣宣奉勅宜重下符勤加檢錄若戶主隱而爲人所告有司忍而不勤督察依法科處不會寬宥。

寬平三年九月十一日

〔日本紀略十四後一條〕長元四年三月十四日辛酉源良國者太宰大監大藏種材男也先年射殺大隅守菅野重忠犯人也忽改姓名謀計也。